

Haapiiraa Tumu Haapaòraa : Rūtero e Taravino

E haapiiraa teie tei piahia i roto i te VP 2009.

E faaòhipahia te tahi mau tuhaa no te tāuàparau i te tumu parau o teie V1/DT1/2015-16 :

« Te Atua, te Metia e te Rahu », Terereatau, 14/10/2015.

Ioane Taravino e te EPM i naùanei : te pāpetitoraa

I muri aè ia Taravino, te haere tià nei te porotetaniraa i hea ? Eita teie uiraa e hope i te hoê anaè nûmera Veà Porotetani ! No reira i mâtihia mai ai e au te tahi tumuparau, mai te pāpetitoraa, ei tautururaa ia tâtou i te hiroàroà e tei hea atu ra to te EPM i naùanei i roto i ta na faaòhiparaa i te *tuhaa âià* (*héritage*) a te rohi-reforomâti (réformateur) ra o Ioane Taravino. Teie râ, e tià ia haamanaòhia i ô nei te parau reforomâti no reira mai te reforomâtioraa e te porotetaniraa : oia hoì, eiaha ia àramoinahia ia tâtou e ua fänau mai te reforomâti nâ roto i to Maratino Rûtero haafaufaa-ûàna-raa i te *sola fide*, oia te *faaoraraa a te Atua o Ietu Metia mā te faaroo anaè* (1). Mai haamanaò atoà hoì tâtou e tei te hitiraa o te râ no te reforomâtioraa o Rûtero mâ te *sola fide*, e tei te toparaa o te râ o Taravino mâ te *soli Deo Gloria* (*i te Atua anaè ra te Hanahana*), e tano atoà ai ia tâtou ia faahiti tâmau mâ te faaau mâite i teie nâ rohi-reforomâti e pitî.

Ia rave anaè mai hoì tâtou i te parau o te pāpetitoraa mâ te ui e *e mea nâ hea ta Rûtero e ta Taravino tuatâpapa-tâtaitahi-raa* ? e ia au i te mau pâhonora, *tei hea tâtou i naùanei i te oraraa i te parau o te pāpetitoraa* ? te fârii ra ia tâtou i nâ rohi-reforomâti ei tuhaa âià tei turu mai â ia tâtou i teie tau no to tâtou oraraa faaroo ei EPM, ei Ètârëtia fenua titauhia ia ora òitumene e te tahi atu mau Ètârëtia fenua, e ia tâuàparau i te tahi atu mau haapaòraa (*religions*) mâ te vaiara tâmau e na te *sola fide* e faaora i te taata hara nei.

Te pāpetitoraa, ei « tâparau »

E hitimaùe vëtahi i mua i teie huru paraura, oia te *tâparau* (2) ! Ua mâtou tâtou i te ìte i nâ *tâpaò moà* e pitî, te pāpetitoraa e te *Ôroà a te Fatu*. No tâtou te porotetani nei, e nâ *tâpaò moà* teie ei ìte-mata-raa na tâtou i te hâmani-maitâi (aroha mau) o te Atua tei òre e ìte-mata-hia e tâtou.

E aha te *tâpaò* ? Te tâpaò, o te tahi ia *â* (*mea*), te tahi *poroìraa* a te hoê taata i te tahi atu taata. Ei hiòraa, i te maaraa puromu, te vai nei te pou-môrî no te tereraa pereò : te môrî *tâpaò* mâtie, te *poroì* mai ra ia e te matara ra te tereraa pereò. Ia au i teie auraa, e ô atoà te haapiiraa a Taravino no te pāpetitoraa. Inaha, no teie rohi-reforomâti farâni/heretitia, e « *tâpaò* » te pāpetitoraa, no te mea te *poroì* mai ra o na e na te pāpetitoraa e haapâpû, e haapâtuutu e e faaitoito i te faaroo. Ârèa no Rûtero ra, eere te pāpetitoraa i te *tâpaò*, e auraa ê atu râ to na, e o ta tâtou ia e parau nei e « *tâparau* ».

E aha te *tâparau* ? O te tahi ia *pâpâraa*, te tahi *faaîravaravaraa* a te hoê taata ei tuuraa rima na na. Te parau rahi i roto i te *tâparau*, o te fârereiraa mai ia vëtahi mataèinaa (*sujet*) i te hoê mataèinaa. No Rûtero, ia au i te tahi hiòraa no teie mahana, e « *tâparau* » te pâpetitoraa, no te mea, nâ roto i te pâpetitoraa, te fârerei mai ra te Atua Metua mâ te Metia e te Vârua Raa i tei pâpetitohia : i taua fârereiraa ra, te Atua Metua e hô mai ai i ta na « Parau faatâvai » i tei pâpetitohia ei « tamaroa », ei « tamahine » na na i roto i te Metia e te Vârua Raa e nâ te haereà o te oraraa faaroo èvaneria.

Te pâpetitoraa e to tâtou porotetaniraa i naùanei ?

I roto i te rituria nînamu EEPF, te auraa no te taò ra *tâpaò* tei faaòhipahia no te pâpetitoraa e te *Ôroà a te Fatu* e *tâparau* ia. Tei tâtou nei râ i te hiò-faahou-raa i te auraa reforomâti e orahia nei e tâtou no te pâpetitoraa (3) : no te tahi pae o tâtou, ua riro te pâpetitoraa ei *tâpaò*, oia hoì ei *poroì*, ei *ìte*, ei *haapiiraa*, ei *haamâramaramaraa* o ta te Atua e hôroà mai i te taata nei ; ârèa no vëtahi ra, te pâpetitoraa, e *tâparau* ia no te tuuraa rima a te Atua Metua mâ te Metia e te Vârua Raa no ta na Parau faatâvai i tei pâpetitohia i roto i te fârereiraa faaroo èvaneria.

I ô nei, ei taururaa ia tâtou, teie te tahi mau uiuiraa ia vaivai mai â te tâuàparaura : aita ânei te tahi huru arataîraa taravino a tâtou i aratô ia tâtou i te « *mata-hurahura* » o te ao nei ia ìte i te « *ê-na-raa* » o te mau faaoiraa a te Atua hou te rahuraa ? E mau faaoiraa o ta te tahi pae e faaòhipa nei ei veheraa i to tâtou ao huifaaroo marumetia ei feiâ tei mâtî/faaora-ê-na-hia e te Atua hou te rahuraa, e te feiâ tei mâtî/haapohe-ê-na-hia e te Atua hou te rahuraa ? No reira, eita ânei e noaa mai ia tâtou te tahi taururu no roto mai i te reforomâti a Rûtero ia fârii tâtou i to tâtou tiàraa « *mata-èinaa* » na te Parau faatâvai a te Atua Metua mâ te Metia e te Vârua Raa, « *mataèinaa* » tei tâatihia, i roto i te naùanei o te faaroo, e te « *ê-*

na-raa » no te upootiàraa o te Metia i nià i to te ao hara nei ? E mai reira, a rohi hua faahou atu ai i tei tiàorohia mai na e Taravino ia fārii tātou i te *Metia perofeta*, te *Metia arii* e te *Metia tahuà rarahi* o ta te pāpetitoraa e parau mai ra ia tātou i roto i to tātou faaroo èvaneria ? I pihaìhi i teie uiraa iti, e mea nā hea ta tātou oraraa i te mau *tāparau* i vaiihohia mai e te Metia, mai te pāpetitoraa, te Ôroà a te Fatu, te Pīpīria, e te mau *tāpaò* e titauhia mai ra ia tātou no te faaïte/poroì i to tātou faaroo èvaneria ?

I te mea e, te ûàna roa atu ra te haamoriraa i te atua ra te Tumu Nui, oia hoì i te Tumu o te Metua Vahine e faahinaaro-hiroàmoè-hia nei e to tātou au-tamariirii-raa, aita ānei teie huru atua e vai atoà nei i roto i te *Institution Chrétienne* a Taravino ? e aita ānei hoì ta te mau heheuraa e te mau aòraa a Taravino e tiàororaa i ta na iho *Institution Chrétienne* e ia tātou atoà nei i teie tau ? I roto i te *Institution Chrétienne*, ia òre hoì ðe ia ara ra, e ôhie mau ã ðe i te faa-atua ia ðe iho, âreà i roto i te mau heheuraa e te mau aòraa a Taravino, e ìte e e fārii ia ðe ia ðe ei taata hara o ta te Atua o te Metia e hinaaro nei e faaora, e faatiàmā, e faatāvai ei tama no te faaâpīraa a te Pâtireia e fā mai nei !

Tihiri Antonino Lucas Òrometua

(1) Tihiri A. Lucas, « Reforomātio e reforomātioraa, porotetani e porotetaniraa i Èropa e nā te Ara (XVIraa-XVIIraa o te tenetere) », Tomite Faaineineraa Tāmau, *EPM Tuhaa 1*, māti 2006, àpi 11-19 ; « Rûtero e Taravino : Te faaroo, te parauatua e te Pīpīria », TFT, *EPM Tuhaa 3*, àtopa 2007, àpi 14-26.

(2) Tāparau : *pāpaì, faairavaravaraa a te hoê taata, tāuàparau*, ah John Davies, *A Tahitian and English Dictionay*, Haere Pō No Tahiti, Papeete, 1985 [1851], àpi 251.

(3) Jean Ansaldi, *Dire le baptême en l'an 2000*, Montpellier 1999. Ah atoà i te mau tuatāpaparaa a Michel Bertrand, André Gounelle, Laurent Gagnebin e François Zorn, *Des gestes qui parlent : Baptême, cène, signes*, in *Église en débat n°3*, ERF, 1997.